

'O TERREMOTO

Ogni juorno è 'nu mistero,
'na scalata int' all'ignoto,
ma riparti sempe 'a zero
quann' arriva 'o terremoto.

Quann' cride ch' hai capito
e te siente cchiù potente,
si 'a fortuna t'ha rapito
e t'ha fatto prepotente;

quann' cride che 'sta vita
tu 'a tiene dint' 'e mane,
sì 'o padrone d' 'a partita
senza tema d' 'o dimane;

quann' 'o sordo dint' 'a sacca
già te fa senti' sicuro
e nun siente mai 'a fiacca,
pecchè 'o fisico è maturo;

senza mai 'nu malanno
che te manna in depressione,
senza mai senti' 'n' affanno,
e puo' canta' ogni canzone;

mentre fai suonno felice,
quann' meno te l'aspiett',
'a mugliera toja te sceta*
e te fa zumpa' int' 'o lietto:

“Ma che è ? ... 'o terremoto ?”
È arrivato all'intrasatt'
e, senza manco 'nu preavviso,
t' ha purtato pure 'o sfratto.

Sient' 'a terra che te tremma,
vide 'o muro che s'inclina,
pare comm' fosse 'o tramm'
che cammina int' 'a cucina;

chillo lampadario appiso,
guarda llà comm' è che oscilla,
pure 'a vita nostra è appesa
dint' 'o tempo 'e 'na scintilla.

E me sento..... piccerillo,
guardo 'ncielo, chiammo 'a Dio,
chiuso dint' a 'stu mastrillo**:
“Mò,ce credo pure io !”

Pure 'o tempo s'è fermato,
pe' nu poco, in verità,
ma 'a paura m'è bastata
comm' pe' 'n' eternità.

Jesci fore, all' aria aperta,
ch' emozione sotto 'a pelle,
'a salvezza pare certa,
può turna' a guarda' 'e stelle.

E te sient' prediletto,
l'altruismo t'appassiona
e te fa pruva' l'effetto
'e addeventa'...'n' ata persona.

Ma dimane, 'n' ata vota,
l'egoismo torna a galla,
e te trascina, scunsulato,
comm'a primm'...dint' 'a stalla***.

Cecco Gambizzato, Giugno 2012

* te sceta = ti sveglia

*** la stalla della vita egoistica

** mastrillo = trappola per topi

Ricordando con commozione ed emozione il terremoto dell'Irpinia del 1980 (2914 vittime) e quello de' l'Aquila del 2009 (309 vittime) viene da chiedersi con sgomento: ma è mai possibile che alcuni terremotati siano ancora oggi nei containers ? Stento a crederlo.